

د / طه حشيش

مريم وفاطنه

الطبعة الأولى

٢٠٠٨



تسويق ونشر

مجموعة أجل لخدمات التسويق والنشر والإنتاج الثقافي

المدير العام

خالد عبد الصمد خفاجي

مدير النشر

عادل متولي

الجمع والصف الإلكتروني

القسم الفني

إشراف وتنفيذ

إيمان خفاجي

تصميم الغلاف: الفنان

عطية الزهيري

طباعة

مطبعة صحرة



تسويق ونشر

مجموعة أجيال لخدمات التسويق والنشر والإنتاج الثقافي

الإدارة والمكتبة: ٤٤٩ ش السودان - المهندسين

الدور الأول - شقة ٤

أمام مجمع محاكم شمال الجيزة.

التسويق: ٠١٢٣٧٠٥٠٢٤ - ٠١٠١٨٨٩٣٦٣

Email: aagyal@yahoo.com

aagyal@hotmail.com

١٠ ٣٥٥٣٧١٩

١٩ ٣٥٠٩٥٥١

١٠ ٣٥٥٣٧١٩

مریم وفاطنه

الكتاب: مريم وفاطنه
المؤلف: د/ طه حشيش
الطبعة الأولى: القاهرة ٢٠٠٨
رقم الإيداع: ٢٠٠٧/٢٤٩١٠
الترقيم الدولي: I.S.B.N. 977-6215-19-X

حشيش، طه.
مريم وفاطنه/ طه حشيش. ط١. - القاهرة:
مجموعة أجيال لخدمات التسويق والنشر والإنتاج
الثقافي، ٢٠٠٧.
١١٢ ص؛ ٢٠ سم.
تدمك: ٩٧٧-٦٢١٥-١٩-X
١- الشعر الشعبي - تاريخ - العصر الحديث.
أ- العنوان ٨١١,٩

الإهداء

- * إلى روح أستاذي العظيم أ. د. علي خليفة أستاذ الكيمياء الحيوية
يطب عين شمس الذي علمني الحب والتسامح.
- * إلى صديقتي العزيزة / ناهد مسعود جرجس المحب والمتسامح دائماً.
- * إلى حماتي "سامية" الاسمر على مسمى والمحبة المتسامحة لأقصى حد.
- * إلى كل إنسان لا يفرق بين البشر إلا بالحب.

طه حشيش

مفتتح

الشعر زى العسل
لكن بدون... نحله
والورد رمزه وصل
لما الحبيب... راحله
ياللى غويت الأدب
هات الكتاب لإبنك
راح تلقى كل الكتب
بالسر.. هاتبو حله

إسألني عنيكى

تسألينى إيه حكايتى

بتقولى عايز إيه؟

إسألني عنيكى الجريئة

جوه قلبى بتعمل إيه!!



كأت بتعزف لحن خلى القلب يرقص

زى مركب حُب فيه قلبين حبايب

وقت عصر فى بحر موجه حلو هادى

يرفع المركب شوّته لفوق

وينزل بالهداوه



زى غصن التوت يميل

يحضنه غصن الزيتون

لما يوم سمعوا الهديل

جاء يفتنى م العيون



لسه برضه بتسأليني
ليه حكايتي وعاييز ايه
إسألني عنيكى الجريئة
جوه قلبى بتعمل ايه!!



ليه ما بترديش قولى لى؟
ليه تدارى الإبتسام
دى العيون الطعمه قالت
من سُكات.. كل الكلام



مش راح أندم إنى شفتك
أو عرفت الحب يوم
ده إنتى كنتى جوه قلبى
حلم طفل فى عز نوم



ياما كنت أتمنى حلمي يطول.. يطول

وأحضن الكف الحنين

بين إيديا وأمشى أقول

إنك إنتى زهر عطرى

وانتى... وانتى

بس حلمي الحلو.. مات

والكلام أصبح سكات

فمت ألقى إيديا فاضيه

إلا من قسوة ما فات



لسه برضه بتسألينى

إيه حكايتى وعائز إيه

إيه راح أحكى.. إيه ها أقول

إسألنى عنيكى الجريئة.. لما بتلاغى العقول

عمر الشقاوة

يا حبيبى..

إغزل الشمس بصباحك

خُذ سفينتى بين جناحك

رجعَ الفرحة لخدودها



دى الليالى..

يوم ما يرضى عنها قلبك

بدرها ييحضن نجومها

والبلابل..

البلابل تصحى تشرب منى حبك

تقلق الأفراح فى نومها

والأغانى..

الأغانى تعودلى تانى

والنخيل يطرح أمانى

والربيع ينعش زمانى

والسما تدوّب غيومها



دى الحياة لما تجافيهها
تصبح الأحزان ناديةها
روحى ما يوم تشتهيها
أو عيونى تطيق ضلامها
يا حبيبى إفرّد جناحك
وانسج الشمس بصباحك
خد سفينتى بين رياحك
فتّح الرقه فى قوامها



نفسى ترجع ليّا تانى

ضحكة دافيه

ضحكه ياما نورت وش الصغار

نفسى ترجع ليا نسمة فجر صافيه

حننت قلب الكبار

نفسى ترجع لحن ساقيه

لحن ساقية - للفلايه -

تدور.. تغنى.. ليل نهار

دى الحياه من غير لقانا

حارة ضلمة الخوف حرقها

والطيور من غير غنانا

قول لى كيف تعرف طريقها

والزهور لو غاب هوانا

تتسى حتى لون ورقها



نفسى أشوف الضحكه تانى
تحضن الوجه الأصيل
والطيور تكتب أغانى
فوق.. على جريد النخيل
والسمك يغزل شباكّه
من خيوط موجك يا نيل
نفسى أشوف الحب نسمة
تتمش الجسم النحيل
نفسى ألقى الكل عايش
والقلوب بتصب نور
والشجر مبسوط بيرقص
عاجبه ألحان الطيور
نفسى أشوف الحب ماشى
بين مَكن دائماً يدور
والضمير رُبان وصاحى
للسفّارين فى البحور
نفسى لو ترتاح جراحى
وأغتسل من نور صباحى
وأزّرع الأرض اللّى بور

وفين بس زيك ألقى؟

وبعد أما دبت زهورى
ونامت طيور المودة
وتاهت مراكبي فى بحورى
وعشقت عيوني سهادها
وفجأة لقيت قلبى غنى
وعيني بترقص رموشها
ده أنا نسايم شفايفك
حييتنى وما قدرت أحوشها
وكلمة "أحبك" فى قلبى
بنورك نقشنا حروفها



تعالى..

تعالى وإيدك فى إيدى
نلّم اللى راح واللى آتى
ومن عطرك أغزل قصيدى
وأرجع حلاوة حياتى
وشعرك يهفهف نسائم
يريح نفوس الصبايا
ده قبلك كان القلب صايم
ولا لحد ميل هوايا
ده وشك ندى فجر صافى
وصوتك ده لحن السواقى
وكفك حنين ودافى
وضحكة شفايفك بُراقى
وحُبك ده أهلى وناسى
وفين بس زيك الألقى؟

ساعة الوصل

مُنَايا إنك ما تتسینی
ولا تتسی آسی عینی
ده أنا عمری ما بنساکي
وانتی دنیتی و دینی
زهوړ الفجر لو دبلت
شذا ثفرك رياحینی
طیور الفجر لو غنت
فده صوتك وتلحینی
ولو شمس الدُنا غریت
فشمسی أنتی علی جبینی



نسيتى شمسنا الطالعة
ده أنا هاكرك.. وما نسيتك
وكنتى فى السنه الرابعه
وباحكى لك حواديتك
ويومها وقعتى فى الترعة
أنا شيلتك وعديتك
ودفيتك على الولعة
وهديتك.. وحببتك!!



ولما شمعتك كبرت
تجافينى وتتسينى
ده مية ترعتى جفت
ومين غيرك هاىروينى



تعالى نقلب الصفحة
نرجع عهدنا المونس
دا لما تلبسى الطرحة
وعينك شاردة ما بتهمس
وكنت أسأل: فى مين سارحة
تقولى.. فى قلبك المخلص
يطير قلبى من الفرحة
ونحضن بعضنا ونرقص
وعصفورتى أهى كبرت
وبعدت عن أهانينى
وطارت فى الفضا ونسيت
ده ريشها من رموش عيني



نسيتى لما كان يكبر
دُرانا.. كنا بنولع
عشان نشوى الدرّه الأخضر
وفى عيونا بنطلع
نسيتى لما نتفنن
فى حته طينه ونبدع
عروستك حلوة وتجنن
وأنا طينتى بقت مدفع
وبعد الشمس ما تروح
نجيب البعب ونطرقع
◆◆◆

نسيتى الشط والرملة
ونسمة بجرنا هاله
أنا أحفر رملتي خندق
ورملك يتبنى فيلاً
عنياً صحيه ويتبرق
وعينك تحرس الغله
وساعة الوصل ما وصلت
ولسة إنت هناك طاله
ومن يومها ومستتى
أقول يمكن تكون جايه
أقول يمكن تكون نسيت
طب إزاي بس تتسينى
ده أنا عمرى ما بنساكى
ولا تاهت عناوينى

حَنِّي يَا يَاسْمِينَا حَنِّي

عيد سعيد عشان بحبك	قبل حبك كان فظيع
القمر غار من حلاوتك	والخریف أصبح ربيع
قلبي ده بيعشق شقاوتك	بيكي كل الكون أبيع
سامحي قلبي لما يعشم	يحضن الوجه البديع
ده إنتى حبك ليا بلسم	مالى غير قلبك شفيع
طول ما حُبك ليا يكبر	العزول يصبح وضيع



عام جميل بهواكى ليا	بيكى عايش أحلى عام
هاتى إيدك بين إيديا	لأجل ما يعم السلام
حبي ليكي أعظم هديه	يهدى روحى فى الظلام
يمحى ظلم الناس لقلبي	فوق جبيني يكون وسام
البشر باعوا المشاعر	كل شيء أصبح بكام!!
بس قلبي أنا بيكى شاعر	يا أم أجمل ابتسام



بُعدي عنك مستحيل قلبي ها يكسر ضلوعي
والآنين أصبح بديل إمتى يقرب يوم رجوعي
دول عنيكى نجمتين نوروا بالشوق شموعى
فين حنانك ليّا فين؟ ده الحنين جفف دموعى
نفسى نصبح عصفورين ع الشجر نرقص نفثى
نفسى نفضل فرحانين إنتى روحى وحته مئى
نفسى ليل المجروحين والقمر ما يغبش عئى
دول شفافك وردتين حئى يا ياسميننا - حئى



حبك فرض

يا طير إرجع لأغصانك حياتي عايشها علشانك
ومين غيرك يغنى لي تعالى ارتاح في أحضانك
ده أنا من غير هواك صايم ودقة قلبي ألحانك
ومن أول ما حببتك وأنا هايم في أنغامك
تعالى إرحمني م الغربة وغرد كيف ما يحلالك
حياتي بدون هواك كريحه ما فيش أحلى من أيامك



هواك خلّى الحياة جنة وأنا رضوان على بابها
ده حبك فرض مش سنه محلّى الدنيا بأحبابها
بدونك كيف أنا أتهدى وأنسى الفرقة وعذابها
منايا في يوم ما تهجرني لكاس الغربة أشربها



يا قاسى إرحم محبينك وحن يا قاسى على قلبي
ده أنا مشتاق لنور عينك ينور في الجفا.. دري
يا روحى روح على راحتك لآخر الدنيا.. يا حبي
ومهما بعدت أنا جنبك تنادى القلب هايلبي
عليك قلبي بدون حبك ومين غيرك يكون طيبي؟
ده أنا عاشق ومين يقدر يكون عاشقك وهايخبني!!



أحلى ذنب

رغم بعدك عنى وافى ده إنتى روحى باحيا بيها
دق قلبك ليّا شافى فى الحياة طول ما أنتى فيها
الخریف بهواكى دافى والغيوم راحت عليها
ده إنتى وردة حُب صافى ياما طال الشوق إليها



نهر حبك يروى قلبى ياللى قلبك أصفى قلب
لو فى يوم راح تنسى حبي الطريق راح يبقى صعب
لو هواكى كل ذنبى يبقى حبك أحلى ذنب



يا حبيبتي فين عنيكى لأجل ما تتوّر سبيلى
دفعى إيدى بين إيديكى خلّى فرحك يملأ ليلى
قلبي شوقه زاد إليكى ما فى غير قلبك دليلى
إنتى وردة وريحتى فيكى لو دبلتى - آه يا ولى!!



بكره لازم ننتصر

كان متايا إنسى أقابلك	وانتى جايه من السفر
وأرمى نفسى فى دفة حضنك	وأنسى خوفى من البشر
نفسى أسمع دق قلبك	يحمى قلبى من الخطر
نور عنيكى يا حبيبتى	فى ليلى أجمل م القمر
والشفاف لما تهمس	زى عصفور ع الشجر
مش راح أقدر عنك أبعد	حبى ليكى صار قدر
كل يوم القلب يمزق	بكره لازم ننتصر



الحياه من غير لقاكى	ليل فى صحرا الخوف ملكيه
والطيور لو غاب غناكى	تسهر الليل تبكى فيه
والورود لو راح شذاكى	تنسى لونها شكله إيه
إنتى شمسى يا ملاكى	نور عنيكى بأحيا بيه
وانتى نسمة بدون هواكى	عمرنا ها نعيشه ليه؟



إنت القمر

إنت القمر
ولا القمر ده طلعتك
يا للى الهوى
داعب فؤادى بضحككتك
مين اللى قال إنك بشر
آل زينا
ده إنت ملاك
أتمنى أحيا فى جنتك
إنت المنى..
إنت الغنا
يا حبيبى أنا
قلوبى طيوره زهرقت
على بسمتك

قبلك حياتي كات ضنا
واليوم هَنَا
طول ما أنت مالى الدنيا..
من حنيتك
إنت الفنار بيك السفاين تهتدى
لما البحور تقسى
تتور شمعتك
بس إوعى تقسى يوم عليًا والنبي
دى الدنيا صعبه
هون عليًا برحمتك
إنت الحبيب
والقلب حالف بالنبي
تصبح نصيبه
وهواه يكون من قسمتك

يا ما شلت هم
وقلبي عمره ما اشتكى
لكن ما بقدرشي في يوم على قسوتك
شوقي إليك
خلي الفؤاد عنك حكي
ماسكتش إلا لما شاف
يوم دمعتك
من يومها حالف
إنه ما يعرف "حدا"
ولا يوم هايمنشي في سكه
إلا ف سكتك.

إزاي نخاف

إنت وأنا
قلبين نضاف
مع إننا
روح واحدة سارية في جسمنا
طلب ليه نخاف؟
الحب نسمة للبحور
الحب ألوان الزهور
قبلك ما يوم حبيت أنا
ولا زى حبك يا حبيبي
أنا قلبي شاف
طلب ليه نخاف؟
❖❖❖

حبك حياتي
وهو فيه بمدك حياه
صوتك آهاتي
ياللى قلبى من غناك الخير ملاه
قلبك سفينة العاشقين
وعنيك فنار الحيرانين
لو مرة موج البحر عالى
أو مركبى تاه فى الليالى
تتمد إيدك - يا حبيبى - طوق نجاه
تخضر أيامى المجاف
طلب ليه نخاف
إزاي أخاف
أنا زى حبك يا حبيبى
ما قلبى شاف
❖❖❖

الله عليك
لما ابتسامتك تحي قلوب كل البشر
أنا بين إيديك
أصبح ملك بعد أما كان قلبي حجر
إنت في سمايا نجمتي
وإنت في هوايا قسمتي
إزاي بقي أنساك أنا
ده إنت اللي راوي قلبي
من بعد الجفاف
إزاي أخاف
طب ليه نخاف
أنا زى حبك يا حبيبي
ما قلبي شاف

فانوس عزرائيل

فوق ضهر عشه صغيرة
جنب البحيرة الزرقا..
فى لون السما
على وش بابها منتوره..
شبكة قديمة حنينه
أصل دى شبكة عمنا
من لحمنا ومن دمنا
من همنا ومن فقرنا
ريسنا عم فرغلى...
صياد حليوة بس حظه مغلبه
واد كله صبر وزاده شغله صبر تانى
أصعبها ربح عمر ما تقدر تغلبه

قلبه نضيف..
يحب ناسه ومش أنانى
من عمره فات ثلاثين سنه
مع إن وشه..
يقولك إنه ع المعاش
وضهره ده اللى انحنى
يديه شهاده بإنه عاجز ع العمل
ودا كله أصله من الشقا
وجبينه يحكى حرب بيعيشها البطل
وأدى دليله من الخنادق والحفر
على وشه - ياما - منتوره
ومراته ماهش أقل منه فى الشقا
صحيح مراته بنت حلوه محندقه
وعايشه دايم بالأمل
لكن تقول:
"طب فين بروح بين الليالى والسهر..
وش القمر"

رِسْنَا عم فرغلى
له م الولاد..
ابنين سماره صغيرين
كان كل يوم بيشق موج الترعه بدرى بمرکبه
وابنه الكبير.. دايماء معاه بيرکبه
يضحك..
يفنى..
يضحك يفنى ويعمل إنه مش حزين
يضحك يفنى ونبض قلبه ده.. أنين
عمره ما شاف الشمس طالعه ف عشته
يسرح ويبجى..
ويحمد الله ف نعمته.
قانع وصابر
قانع بشغله..
وصبره جاي من حکمته
"هو ابن آدم إيه يعوزه..
غير لقمه حلوه وهدمته؟!"

وف يوم وقاعد فوق حصيرة عشته
والدنيا لسه قائمه تصحى مشققة
رجليه ماددها طينه سمره مشققة
همس فى ودنه ابنه الصغير
هات لى يابا فانوس ملون زى ابن أم إسماعين
فرغلى لونه اتخطف!!
والعرق نازل يسيل
فوق كتافه مد إيده حنينه:
النهاردة لما هارجع
النهارده لو شاء الله هابقى أجيب لك ده الفانوس
بس إدعى لى يا سمكه
ربنا بيعت فلوس
وانشرح قلب الصغير
بابتسامته الفجر نور

قام فرغلى وزى عادته كل يوم
شق موج التربة بدرى بمرکبه
وشراع صغير ركبه فوق مركبه
وخذ معاه ابنه الكبير
لكن رياح البحر كانت قاسيه.. قاسيه
وكانها مستقصده!!
وكانها مستقصده!!
وكان ریح البحر كانت ناسيه..
ناسية إيه فرغلى وإيه يقصده!!
ويعد كل دى المجازفة
عاد فرغلى وبدون مؤاسفه
من غير فانوس يرضى الولد.
وقابله إبنه فى سكتة
فاتح إيديه.. وضحكته فوق فى السما
فین الفانوس يا با أجيب له شمعتة؟
رد ريسنا بأسى:
بكره أجيب لك..
بكرة إيه.. إنت يابا ليه بتكذب؟
إنت مش بتحبنى
إنت مش بتحبنى

فرغلى عنه زغلت
"فرغلى عقله ارتبك"
وبكره برضه..
وبعد بعده وبعد بعده
زى عادته شق موج الترعه بدرى بمركبه
لكن ربح الترعه كانت كل مرة بتغلبه
رجع الجدع يلعن ف حظه..
واللى فيه بيهبه
ولما رَوَّح عشته
إبنه جاى له تانى لأجل يأنبه
"فرغلى عقله اتهيل"
فكره شوته وقال لقيتها المعجزة
أسرق فلوس من عند عبده الجزمجى
"فرغلى عقله اتعدل"
صرخ ف عز الليل وقال: لا يا غبى
مش هيا دى حكمة جدودى ومبدأى
الصبح هاطلب م الجيران..
يمكن..
يمكن يلبوا مطلبى
أول م راح لعاشور أفندى

بیربی نشئی صغیرین
ضحك ف وشه ضحكه عاليه خضته
"فانوس ده إيه يا عم الأسطى فرغلى
إياك تكون فاكرها هيصه سبهلى"
راح لعم الأسطى فتحى القهوجى
كان رده تعرف هو إيه:
"فانوس ده إيه اللى إنت جاء تقول عليه
إنت عارف قبله سمره ده يبقى إيه؟"
ولف عم فرغلى
م القهوجى للطرشجى
أستاذ عاشور والجزمجى
كان رد واحد كلهم
"ده عدونا ولا يمكن أبدا ننجده"
فرغلى عقله اتروش
حلف لياخذ تاره من كل الحوش!!
وف نص ليل الحزن نفذ فكرته
من فوق عامود النور برجل مشققة
وايدين سماره عليه تلف وتحضنه
وبسرعه تسبق نور فانوسه وشمعته
كان فرغلى..

فى وسط بيت أستاذ عاشور
أخذ فلوس يا دوب تكفى خطته
ويسرعة تسبق نور فانوسه وشمعته
كان فرغلى فوق العامود
ودماغه م الأفكار تدور
مسك بإيده وخط رجله ع العامود
رجليه حزينه بترتمش
مد رجله الثانيه ينزل ع العامود
وفجأة..
رجله تنالش!!
وقع يلف
فرغلى قطع النفس
فى الفجر بدرى..
إثنين شباب من حنته
خارجين يلقطوا رزقهم
مدوا إيديهم قلبوه
وخدو الفلوس..
من غير أسف!!

مذكرات مهاجر رغم أنفه

.. من جبال الغربة يا أمه

والغريب دائماً حزين

كلُّ همٍّ يعود لأرضه

بس مين يسمع له.. مين؟

❖❖❖

من جبال الغربة بابعت

دى الرسالة والعتاب

إن رضيتى أو رفضتى

برضه ها أبداً فى الحساب

❖❖❖

افتحي الدفتر وهاتي
نحسب الحاصل يوماتي
إيه جراك
الإيدين سمره وحزينه مشققه
إيه جراك
يا أم الضفاير حين تهفهم كات تريح م الشقا
يا أم السواقي في الغيطان
سابهم أبونا قبل ما يسبنا بزمان
"سابهم لنا"
قال دي لنفسه
دي لمحمد
دي لحسين.. ولشهرزاد
كان مقسم كل أرضه ع الولاد
عمره ما قال الأرض دي "لجوز أمنا"
دولانه عمره في يوم ما فكر
إنك إنت
إنت يا أمه
يوم تحنى لضل راجل بعده..
إلا لضلنا

إيه جراك
م اللي شال فى البرد شالك
م اللي بؤر أرضنا
مين ده يا أمه
يا أم الإيدين سمرة وحزينه مشققه
يا أم الضفاير.. حين تهفف
كات تريح م الشقا
❖❖❖

صدقينى
عشت طول العمر أحلم
وأزرع الأوهام بكفى
والنهارده....
النهارده أنا وهمى يشهد
إنه عاجز التوهم
"للى فيكى اليوم بشوفه"
دول ولادك.. دول بناتك
فلاحينك.. بناينك.. خيازينك
"عمرهم ما داقوا م العيش غير حروفه"
❖❖❖

واللى مخه نضيف مهاجر
واللى هاجر كيف نلومه
طول ما قصر الزيف ده واقف
واحنا بنرى له بومه

❖❖❖

والكتاكيت الصفار من كل حاره
نايمه جنب الحيطه.. يا أمه.. مخنقه
علشان م بترى لها ريش
يحميها من ظلم الشتا
عشان م طالبت يوم - بقوتها
والميون تايهين حيارى
عين يمين بتبص فى العين الشمال.. ومبخلقه
.. مستغريه

وكانها ما يوم شافتها
والبطون لازقه فى عضمه ضهرنا..
متمسرة

والكفوف ناشفه وحزينه.. مخزّمة
والبرد راقد ع الرثه
والعقول متشعلقه
دى العقول متشعلقه فى آخر نفس
والقصر واقف وبثقه
وفين راح يوم - يلاقى القصر - زى جهلنا -
للزيف حرس
والعقول متشعلقه فى آخر نفس



يا أم الإيدين سمره وحزينه مشققه
يا أم الضفاير حين تهفّف
كات تريح م الشقا
يا أم الضفاير.. فّين ضفايرك؟
ليه ضفايرك.. يا أمه صارت مشنقه؟؟

الناس والأرض

السما فُتِحَ بيبانه

السما شال البيان

الغيوم تدخل وتخرج

فى الزحام ما شئ بيان

❖❖❖

غيمه تشكى لأختها..

سر الحقيقة اللى إندفن

نهشوا الديابه عرضها

وإدوروا وسرقوا الكفن"!!

❖❖❖

نزلت عيون كل الغيوم بالبكا
دم ودموع ملؤ البحور م اللى إتحكى
يا..

ده إنتم قلوبكوا حنينه

واحنا هنا

ع المصطبه

نسمع قصص متحبكه

نرتاح لطعم الطبطبه

نضحك لتعبان سمنا

ونمجده جوه الفنا

❖❖❖

الدموع الجارية ديه مش غريبه عننا
الدموع ديه عرق
الدموع ديه عرق قلب انحرق وسط الفيضان
وعليه ماسك الفاس
بيشق بطن الأرض
والأرض زى الناس
جواها صار دبلان
وعقولها متحجرة
وعليه ماسك المنقرة
ينفخ فى بذر القطن
يلعن حبوب الدرہ
والقلب مليان ندم
"إزاي بجرة قلم.. على ورقه متعفّره"
"يوم الحساب خلته.. سوري وصوته انعدم"
سوري وصوته انعدم.



الدموع الجارية دية من هنا
من بُكا الأطفال وبرد الظلم ياكل عضمهم
يتلفتوا

وبيسألوا ليل الشتا عن أمهم
لأجل ما يدفوا في حضنها
بس أمهم كانت كعمود كبريت
وفي وسط ريع الشتا
البرد هزَّ المطر

العمود ضعيف إنطفا
نادوا عليه صرخوا
في الضلعة ضاع الأثر
أصل يا ناس - أمهم
كانت في حابه لدفا

❖❖❖

الدموع الجارية دية من حديد
الدموع دى من حديد فى القرن داب
الدموع دى من إيدى عم إسماعين
لما يلقط فى الهواء سيخ الحديد
ويدخله فى القرن لأجل ينضفه ويمدله
عم إسماعين دايمًا يقول:
"العلم لسته فى أوله
العلم ع الأبواب"
الناس تقول إنه إتهبل أو عقله غاب
كيف الكلام وإحنا وصلنا للقمر!؟

عم إسماعين يصرخ يقول:

"إحنا وصلنا للقمر

وقلوبنا صارت كالحجر

العلم إيه سره

مش يخدم الإنسان

لوجه فى يوم ضّره

يبقى أكيد ده شيطان

والعلم يصبح جهل

والجهل يصبح علم

طول ما إنت خالى الأهل

الحرب زى السلم"

❖❖❖

قالوا له لا يا عم

العيب ده مش فى العلم

العيب فى مخ الناس

عم إسماعين يتصعّب

يضرّب على الكفين

"والعلم جايّ منين.. العلم جايّ منين؟"

❖❖❖

كان يوم مناه عم إسماعين
تدخل عقول الناس في الفرن تتعدل
لكن حماره زهق
ودماغه راح تنفلق
ولاحد فيه يسأل
ما يلاقى غير البكا
ويغنى ويمول
"ياليل يا عين يا ليل
الصبر لونه جميل
وهدومه متقطعه
يكره يصير له ديل
وهايمشى ع الأربعة"

ياسى الودع ما ترد

جوة الجنينه جدع
أسمر بلون الليل
أصفر بلون الهم
لكن قلبه زلال
قاعد يشوف الودع
ويغنى بالموال
"يا ليل يا عين ياليل
قالوا الحياة فى الموت
والموت ده أصله حياة
وإحنا حياتنا سكوت
وإن يوم نطقنا يكون
غاية كلامنا.. آه"

❖❖❖

يا ليل يا عين يا ليل
إحتار في إيدى الفاس
أزرع أو أحبسها
الكل زارعه خلاص
طارح.. وأنا لسه

❖❖❖

قال له الودع... يا جدع
ياللاً إصحي بطل نوم
ده الخوف ما عمروش نفع
ولا مرة غير قوم.

❖❖❖

قوم دور الساقية
إغسل خدود الأرض
إحى البذور إحى
صحي اللى نام صحي
إزرع جناين ورد

❖❖❖

يرتاح لها العشاق

وتصبر المشتاق

في فراقه خلانه

لما يجي له رد

❖❖❖

قوم ياللا شد الحيل

خلّى الشجر يخضر

يحمى الضهورم الحر

ويدفئ برد الليل

ويذل ليل البرد

قوم ياللا صبحى النوم

ده الخوف ما عمروش نفع

ولا مرة غير قوم

❖❖❖

رد الجدع ع القول
طول عمرى شایل أنا
أحبابى فى عيونى
فى الفرح نفرح سوا
فى الشدة ينسونى
شبعتم عيونى بُكا
ولا حتّى عزونى

❖❖❖

ده أنا ضهرى ياما إنحنى
من كتر ما شال شيل
أنا اللّى اعلّى البنا
لكن نصيبى قليل
أنا اللّى ضهرى إنحنى
قبل الأوان بأوان
أزرع غيطانى "هنا"
وأجى أجمعه أتهان

❖❖❖

ساعة القضا والنار
مطلوب.. ما غيرى سيد
وأرجع ألقى الدار
منهوب.. وناس بتهذ
ده العقل ياما إحتار
والحيرة زى النار
تاكل ما ترحم حد
ياسى الودع ما ترد..
ما ترد!!
❖❖❖

الأوله آه

الأوله آه

التانيه آه

الثالثه آه



الأوله آه ومين داق الهنا هينا

التانيه تاه صدى صوتى بين المينا

الثالثه ياه فى سوق الخلق لفينا



الأوله آه ومين داق الهنا هينا ولم تكو إيديه النار

التانيه تاه صدى صوتى بين المينا وموجة بحرها الغدّار

الثالثه ياه فى سوق الخلق لفينا وأنا عقلى يا خلق إحتار



الأوله آم ومين داق الهنا فينا ولم تكو إيديه النار وداق الويل
الثانيه تاه صدى صوتى بين المينا وموجة بحرها الغدار وحزن الليل
الثالثه ياه فى سوق الخلق لفينا وأنا عقلى يا خلق إحتار ومش لاقى لعقلى دليل

❖❖❖

الأوله صاحب نجوم الضهر ماندمشى
الثانيه ملم كراكيبه لحد الساعة ما رجمشى
الثالثه داير يلف فى سوق الخلق ما غلبشى

الأوله آم

الثانيه آم

الثالثه آم

...ولما فتننا

مشيت..

مشيت بدون ما تقول لنا

وفي لحظه غبت

من قبل ما تدوب شمعتك بين شمعنا

كنت إنت دبت.

من بين جبال الحزن في العشرين سنه

بشويش كده

قمت إنسحبت

❖❖❖

صرخت أنا...

صرخت لما فتننا

وقالوا لي إنك - يا حبيبي - مت

إزاي يموت

عود قمح لسه السنبله فيه ماستوت

قالوا لى إنك خفت
خفت لأحسن يوم يدوسك
يدرسك..
فى الجرن ساعة الضهر - نوح غدونا
صرخت لما فتنا
إزأى يمد الليل إيديه المظلمه والظالمه
ويغمى شمس الفجر قبل ما تنفطم
صرخت لما فتنا
إزأى وقدام شمعتك
الطاله ع العشرين سنه ومنوره..
صفحة حياتك ترتمش
سرطان ييجرى فى دمها
الصفحة لسه صغيره
صفحة حياتك تنكمش
وبنور شموعك تنكوى..
ويتطوى
دى الصفحة لسه ما اتقرت
الصفحة لسه ما اتقرت.

مصريا أحلى الأسامي

مصريا أجمل شفايف	بيها كنت أجرح صيامي
نفسى أتكلم وخايف	حد يزعل من كلامي
المغمض فيكي شايف	والحرامي صار عصامي
مصر إنتى شمس فجرى	وانتى أحلامي فى منامي
مصر أفديكى بعمري	مصريا أحلى الأسامي



مين هايقدر يشتريكي	ده إنتى مهرك فى العلالى
ع الدوام بتباهى بيكى	ما إنتى أنسى فى الليالى
النهارة ليه بأحس	إنى بيكى غير مبالى
إيه جرائك قولى بس	مين نهب مالك ومالى
لوهاقول ده من ولادك	خايف أطلع يوم ضلالى



أحلى ما فيكى إبتسامتك حتى وإنتر فى الحروب
والأصالة دى علامتك ما فى غير صوتك طروب
شمس بتسور طريقى قلب دافى فى الكروب
ما فى غير حُبك حقيقى بدر ساكن فى القلوب
كُنّا بنعشق ترايبك ما إنتر ولادة وحلوب



طول حياتك شايله هم عشق محبوب للحبيب
عمر يوم ما قلتى كم عاش على كتافك غريب؟
بالشباب ضحيتى لأجل يرجع القدس السليب
والعذاب كم لون وشكل دُقتى حتى م القريب
بس أنا حابك بشكل يا أم قلب كالحليب

مصر المحبة

قوم بينا نروى الأرض البور تطرح فرحة وتطرح نور
نزرع قمح يكفى ولادنا نزرع ورد جميل وزهور
غير الحق ما يوم نتكلم نكره غش الناس والزور

قوم بينا نروى الأرض البور

قوم يا محمد حُط إيديك فى إيدين مينا نعدى بحور
وانت يا مرقص شيل فى عنيك أحمد أخوك هاتعيش مستور
بُص العالم من حواليك من وحدتنا إزاي محسور

قوم بينا نروى الأرض البور

إحنا حضاره ودين وتاريخ والإرهاب ده كلام فى كلام
مين بيصنع فى الصواريخ مين بيكتر فى الأيتام
مصر دى مهبط للأديان طول عمرها فى آمان وسلام

قوم بينا نروى الأرض البور

قوم.. يا مصرى

قوم يا مصرى كفاية نوم دا اللي نام وياأنا قام
كله أصبح ليه يعوم وأنت غرقان فى الكلام

❖❖❖

قوم وقول الحق مرة وانسى خوفك لو ثوانى
ليه حياتك يا بنى مرة من سكوتك.. يا أنانى

❖❖❖

السكوت مش كل مرة كان علامه للرضا
بُص حال الخلق برة وصلوا كيف دول للفضا

❖❖❖

بالعلوم مش بالخرافه بالحقيقة بدون رُتوش
مش بفلّيك للجوافه أو بسفّ البردقُوش

❖❖❖

عندنا الكذب آفة كله يفتى "له.. مَالوش"
خَدنا نُوبل فى الهيافه عننا... يا رب حُوش

أَنَا (*)

أَنَا.. أَنَا.. آم يَا أَنَا
باركى لى طلعت لى سِنَّة
والولد عايز يبوسنى
قومى حوشى الواد ده عَنَّا

❖❖❖

إلعبى وياه يا كُوكى
ده ابن خالتك زى أخوكى
وابن خالك وابن عمك
والولاد دول من جيرانا

❖❖❖

حبّو بعض يا مُهند
أوعى تضرب مُوها أختك
دى حبيبتك خللى بالك
منها.. تبق الدنيا جنه

❖❖❖

(*) أَنَا = الجده = نينا.

يا لوى إنت الصغِير
بس طبعك ليه يحير
إغسل الأسنان تمللى
دى النضافة من إيمانًا

❖❖❖

واد جميل والمضم بادی
يا لوى أقعد قصادی
هاتشفوه عريان ده عادى
يمرض العظام أماننا
أنا - أنا - آه يا أنا

❖❖❖

يا مهند إيه الحلاوه
كل يوم بتزيد غلاوه
بس بطل دى الشقاوه
صوته حلولما غنا
أنا - أنا - آه يا أنا

❖❖❖

آخر المنقود يا مؤها
حلوه خالص رى أبوها
القمر دى منين جابوها
بيها رب الكون كرمنا
أنا - أنا - آه يا أنا

❖❖❖

أحلى أم وأحلى دادة
دمها سكر زيادة
أمنا السموحه.. رى
يحميها م العين عشانا
أنا - أنا - آه يا أنا

❖❖❖

حبى كل الناس يا مؤها
الغريب قبل اللى منا
أضلى حب الناس علينا
فرض واجب جوّه دينا

❖❖❖

عقل واحد.. قلب واحد
رب واحد.. إحنا كُنا
ليه العقول صبحت خرايه؟
والقلوب.. ده إيه جرائنا
❖❖❖

حبو بعض يا ولادنا
"طه" ماسك إيدِه "حنّا"
الكنيسة جنب مادّنه
ينصلح بالحب حائنّا.

صح النوم

عدت ما حدى منا شافها
إلا إما صارت بين رجولنا
شايلة الصغير.. فوق كتافها
والبرد بيتكتك سنانها
الشمس كانت فى الرحم
والقطر عمال يتزحم
فوق الشبك
تحت الشبك
الناس فى بعض بتتلحم
يتمرجحوا....
يطوحوا...
يترعشوا من كلمة "إحم"

بين الكراسى مددت
والفرشه.. هدمه مقطّعه
الواد قعد على حجرها
بردان.. ونفسه ترضّعه
أمه بصراحه.. تنكسف
تكشف قصادنا صدرها
الفقر..
الفقر غاصبن عنها
أما الشرف..

ده عمرها

مع إن من كُتر التعب
الكل عينه مغمضه
بس الولد بردان قوى

والمعدة خاليه منفضته
عمال يببكي ويتلوى
فى صباعه نازل عضضه
ضمت رُكابها.. إتكورت
والواد على دراعها.. رقد
وبدا رضاعه إلا وصحى
مرعوب بصوت وش النكد
"ورق.. ورق.. فىن الورق"
ياللاً بلاش البهدله
بالبطاريه ف وشها
ف عنيه نازل زغلله
مدت إيديها ف صدرها
تدى له حق التذكرة
رجع لها إيديها وصرخ
هو إنت غاويه مسخرة

"فين ياختي طرد القفه دى"

"هاتى بلاش البهدله"

- فُقه...!!!

دى حبة برتقان..

يسرح بهم لاجل الوله

- هاتجيبى ولا أنزلك

وعلى الرصيف.. تتشجورى

والبيته..

ما بتسمع ودانها..

إلا كلام الكمسرى

- مدت إيديها وطلعت

من كل جيب.. قرشين تلاته

- هاها صاحبنا وقال لها:

والله لا أنسيكو الشحاته

- الست غطت وشها

والدمع ف عنيتها جرى

وبصوت حزين من قلبها

الصخر منه ينبرى

مدت إيديها للسما..

يا رب

إنتَ اللى عارف محنتى

وإنتَ القوى ع المفتى

إنتَ القوى ع المفتى

- والناس..!!

- طب هو كان فيه ناس

دى كراسى فوقها كراسى

كل اللى نام.. إنداس

والصاحى فيهم..

قاسى!!

آه يا نيل

ماشى ليه سلطان زمانك
من ولادتك فى (رينون) (*)
حتى لما البحر الأبيض
لما كان أبيض بجد
وأنت كان وشك زلال
والفواد طيب حنون
انهارده الوش عكّر
ميتك ما بقتش سكر
جف ليه شجر اللمون
ريقى ناشف نفسى أبله من حنانك
والولاد السمر امتى راح يهلّو
يعلّو شانك
أوعى تحسب أنى عايش لأجل
نفسى

(*) رينون: نبع نهر النيل قبل بحيرة فيكتوريا.

لا: عشانك

ما أنت نفسي وانت دمي
كنت باغسل فيك ذنوبي
وأرمني همي فوق كتافك
كأت سماي في يوم لحافك
وأنت في الأحزان غطايا
وانهارده مين أخافك
حاسس أنك مش معايا
ليه مراكبك
خايفة ترقص فوق مياهاك
فين طيورك
فين غناها
في عز جاهك
مين إللي خلى الطير يغني

بس برّة
ولا طعم الميه مرّة
قُلتك أنا ألف مرّة
احنا مش نسل الفراعنة
الفراعنة قدسوك
كُل عام كانوا ييسوك
فى احتفال مالوش مثيل
جُم ولادك لوئوك
غطوا وشك مكسوفين
من إللى حاصل فيك يا نيل
ولأ خايفين من ملامتك
لا سلامتك
دول هانوك
لكن (وَلَو)
أصبر أنت لما يرحل كل (سَو)
ما أنت طول عمرك أصيل
آه يا نيل

كاكسا كاوا

"إسموك آب"^(١)

يا بشارى.. قوللى

إسموك آب

كنت محمد أو عثمان أو هذاب^(٢)

إنت واحشنى بعد غياب

إهدا شويه

خد "همشوكا"^(٤)

وقت الشدة

أنا برضو أخوكا

داحنا أخوات

ماحناش أغراب

إحنا وطننا وربنا واحد

آدم أبونا وأمنا حوّا

(١) كاكساكاوا: إزاي الحال. والألفاظ الواردة فى هذه القصيدة من اللهجة البشارية حيث يعمل الشاعر بمدينة أسوان وعرف اللهجة البشارية فجاءت هذه القصيدة والتالية لها لأهتمام الشاعر بهذا الجزء الغالى من الوطن.

(٢) إسموك آب: ما إسمك.

(٣) هذاب: إسم علم بشارى.

(٤) همشوكا: خد نفس.

"كاكساكاوا.. كاكساكاوا"

عاتب.. حاسب

حقك تسأل

ياللى ف توشكى وأبو رماد^(١)

طبعاً.. طبعاً

حقك تزعل

بس كفايه يا خويا بعد

إحنا نسينا إلك من ثوبنا

وخلص ثوبنا

لو من تانى نسيك.. إصرخ

قول كذاب.

إنت أخويا وابنى وعمى

دمك دمي.. همك همى

ياللا تعالى وحط إيديك

ف إيدى أخوك..

يا للا وسمى

إحنا مدينه.. وإنت الباب

دانت وحشنى بعد غياب

إنت وحشنى.. بعد غياب

(١) أبو رماد: بلدة مصرية بشاريه على حدود السودان.

سما سيب وشارى^(١)

سما سيب..
ده واڊ "أورجوندى"^(٢)
يعنى مننا.. ما هوش غريب
أسمر نحيف.. دمعهُ قريب
دمهُ زى شريات الفرح عند الغلابة..
أحمر خفيف
وسماره..
حدقة عين جميلة
أما ضحكته..
بتشق ليل المحرومين
زى ننى العين ما يبرق..
لما بيشوف الحبيب.
سبا سيب

(1) سما سيب وشارى: اسم ولد وبنت نوبيه فى قصة جعاج أدول الكشر
(2) أورجوندى: نوبى.

سما سیب وشاری
على شط نيل أسوان....
حتى دنقلة

غنوا سوا
حبوا سوا
شربوا سوا..

حب وحنان
شاری دی حلوه "إن بورو"^(١)
صوتها جميل جنان
لو تغنى كل الملايكة..

يحضروا
فرعونى أصلا وشها..

لو شفتها
تتسى اللى جاى واللى كان
سما سیب..

ده واد "أن تودا شجى ما"^(٢) شویة
بكلامه أحلى من العسل..
سحر البنية

(١) إن بورو: بنت.

(٢) أن تودا شجى ما: ولد شتى

وحنانه غرق قلبها..

وبضحكته.. يشويه شوييه

شارى....

دى بنت حنينة

"أشرتما"^(١)

لكنها زى البنات

محتاجه ويا الحب..

حاجه تأمنه..

بصراحة مال

بتبص دايماع الفتى وابن الحلال

سما سيب

يفنى الليل بطوله.

الصبح يجى ع اللضا..

ويهز طوله

لا شغله ليه ولا مشغله..

لكن وَلَه!!!

(١) أشرتما: خلوه جميلة.

شارى تحبه
لكن هناك "عبد الشكور"
وظروفه حلوه ف البلد..
ميسور
غمزت بعينها الحلوة شارى
عبد الشكور قال والله شارى
والتقى القلبين..
ومحفظة الفلوس
سما سيب..
وقع جوّه الكابوس
ومن يومها وانقطع
سما سيب تماما ع الفنا
من امتى قولوا يا بشر
الحب كان غلب الفنا!٩

مریم وفاطنه

مریم وفاطنه
قمریتین^(۱) .. حلوین .. جیران
صوتهم حنین ..
قلبهم أخضر .. جنان
لعبوا سوا
ذاکروا سوا
ناموا سوا ف نفس المكان
سریر وحید بیضمهم
زغروته حلوه تلمهم ..
آخر السنه

(۱) قمریتین: یمامتین.

ساعة ما نجحوا ف الإمتحان

فاطنه ومريم

عمرهم ما اتفرقوا

ف الصيف سوا

ف البحر عاموا

ف الشتا مع بعض ناموا

ولحاف صُغير ضمهم

لما الدفا يزيد

يعرقوا

الواد ملاك..

شاف فاطنه جوه البحر..

تفرق

صرخت طالبيه النجاه

شدها.. ع الشط..

دلك قلبها

أعطاهما قبله للحياه...

"حبها"

الحب من عند الإله
مش منّا...
يا عمّا
طول عمرنا نعبد إله واحد
حتى الوطن واحد.
وليه الفرقة طالت قلبنا ١٩
يا عمّا
البت فاطنه.. بت طاهره
قلبها زى الملاك
والواد ملاك..
قلبه ده جَمَّار^(١) نخيل
أبيض قوى
والجسم من غُلب الحياة..
أسمر نحيل..
أسمر قوى!!

(١) حمار النخيل: قلب النخلة.

الأهل داسوا حبيهم
من غير سبب
لأ.. والمعجب
قالوا لمريم..
فاطنه إوعى تكلميهها أو محمد
حاسبي يوم..
أحسن أخوها يخطفك و...
ويا سلمك!!

إحنا أهلك.. آه يا مريم
دورنا إن نفهمك.
فاطنه...!٩
إوعى من ملاك... لينصرك
إحنا أهلك.. آه يا فاطنه
واجب علينا... نبصرك
البت مريم..
وشها أبيض زلاك...
قلبها شمع العسل..
يرتاحوا فيه كل البشر.
مريم عنيتها شارد.. زايغه...
مِسْهَمَة
القلب واقع م السما..
هُبْ إنكسر!!

مریم وفاطنه
فاطنه تشکی
مریم تحس بقلبها
مریم.. بتبکی
فاطنه تمسح دمعها
جاکلین بتبکی
من صدري کانو بیرضعوا..
لما یشبعوا
عیشه تحضن ف أختها
على إیدی مشیوا حبه حبه
جاکلین وعیشه بیهمسوا
الله رحیم
الله محبه!!

الديك الرومي

تهت وتاهت بيك الدنيا
ثُرَكِي ومالطي.. وكمان رومي
منفوش دايمًا كده ع الفاضى
مانت عارفنى أنا ملو هدومي

❖❖❖

أنا كتكوت أصفر وصَفِير
غلبان.. لكن لو يوم أغضب
هاملا الدنيا زعيق وصَفِير
بلدى وباكل أنا عيش بلدى
وانت يا سيدى تاكلى "شوكير"^(١)

❖❖❖

(١) شوكير: اسم العيش اليهودى.

ليه يا حبيبى مقلوش عنك
بدل الرومى إنك فرعون
تفطر بيض تتغدى بجبنه
أو تتعشى سيمون وزتون
حقك تاكل أكل تحبه
بس إياك تصبح مديون

❖❖❖

تاكل زى ما تاكل لكن
سيب لنا لو حته فتفوته
إحنا صحيح كتاكيت وغلابه
لكن لنا أعصاب مفلوته
ساعة الشدة بنبقى ديا به
رجلنا جامده تشوط وتصد
وف أيام وليالى قليله
مولدك يا ابنى راح يتفض

❖❖❖

ليه بتفسر حبي إليك
إنى ضعيف وعبيط وخسيس
أنا ليك أحمس^(١) يا ابريز^(٢)
ليه بتمناوع باتراميس^(٣)
خُضت حروب وهزمت أعادى
وقت الشدة أنا باحمى بلادى
وليه يا ولادى..
صبحت فطيس



-
- (1) أحمس الثانى: القائد العام للقوات المسلحة فى جيش الملك ابريز وكان محبوب
وابن نكته ومجارب عمليم ويحبه الملك.
(2) ابريز: ملك من الأسرة السادسة والعشرين الفرعونية.
(3) باتراميس: قائد من قواد أحمس وكان يحتقد عليه ويعمل الوشائيات له مع الملك
حتى كثره الملك.

إنت الديك الرومى وإحتنا
كتاكيت لكن بكره نفز
نكبر نبقى ديوك ونكاكى
نلبس بدل الملكى ده كاكى
ولأركان الدنيا نهز
إلا إن كلنا فى طبق واحد
ف الأفراح أو فى الأحزان
وننام ليلنا ما فيناش جاحد
ويجمعنا الصبح.. آذان

جوزأمی

عیش وسیبنا معاك.. نعیش

خللی صورتك.. ع الأفیش

أمنیاتنا مش كتيرة..

هی بس ألف عیش⁽¹⁾

عیش وسیبنا معاك.. نعیش

قوللی عیش غیمة ف سحاب

أو دُبابة م الذباب

أو مرایة فی الدولاب

زی ما انت عایزنی أعیش

ها اعیش

(1) ألف عیش: بلغة القرانین یعنی عشرون رغیف.

عيش وسينا معاك نعيش
بس حاسب م اللي جى
فى المعارك مالنا.. زى
غيمة ممكن تبقى زين
أو تسيل فوق دماغك
أو تجيب فى الضملة داغك
والذبابة بجناحين
فيها داءك أو دواءك
والمراية فوق دولابك
فيها صدقك أو نفاقك
كل صبح تبص فيها
تلقى صورتك..
فيك بتصرخ..
إيه اللي جابك

بُص فيها شويه فكر
واوعى دَمَك يوم يعكّر
شوف عدوك من صديقك
مين عليك.. أو مين معاك
م اللي عنده ضمير..
ومين..

يوم يخاف ولا يختشيش
عيش وسيينا معاك نعيش
الحياة رحله.. قصيرة
بس إيدك مش قصيرة
واحنا عيّنّا عليك.. بصيره
ساكتة لو هاتعيش فقيرة

أَمَّا لَوْ هُنْتُ الْكَرَامَةُ
هِيَ دَى سَكَّةِ نَدَامَةٍ
تَبْتَدِي وَلَا تَنْتَهِي
عَيْشِ وَسَيِّبِنَا مَعَاكَ.. نَعِيشِ
إِنْتَ جُوزِ الْأُمِّ.. بَسْ
كَانَ زَمَانُ مَا لَكَشْ.. حَسْ
أَمَّا دَلُوقْتِي الْحَيَاةِ..
زَهْزَهْتُ لَكَ فِي الْعَلَالِي
لَا أَنْتِ عَمَى.. لَا أَنْتِ خَالِي
لِيهِ بِتَخْطِفُ حُرْمَالِي
حَاجَةٌ.. أَهْلِي أَدُوهَا لِي
حَقِّ لِيَا مَشْ هَدِيَّةٍ
يَبْقَى لِيهِ تَضْحُكُ عَلَيَا
لَوْ تَبْعَنِي.. مَا اشْتَرَيْشِ
عَيْشِ وَسَيِّبِنَا مَعَاكَ..
نَعِيشِ

فلسطين

ياللى حجيت ألف مرّة
واعتمرت كثير كثير
فيها إيه..

لو رحت تمسح
مرّة.. دمعه للأسير
فيها إيه لو رحت مرّة
شفت طفله فلسطينية
رافعه.. إيدها بالحجارة
وهي راجعه م المدارس...

قول يا حارس!!

لسّه قلب البت أخضر
والضفايرع الكتاف
وانت قلبك ليه محجّر
والعينين صبحم ضُعاَف
عامل إنك مش شايفها...

قول عارفها.. قول يا حاج!!

ليه يا حاج
وبعد كل الحج ده..
من بشر..
إزاي تخاف؟!
فيها إيه لو يوم توطى
وتتاولها.. دى الحجارة
ما أنت يا ابن الناس موطى
بس للأندال.. خسارة!!
للحرم.. لبيت وجيت
بالحرام.. أيام غنيت
فيها إيه لو يوم.. يا ريت
عشت مرة.. مش أنانى
غصب عنى خلاص يا حاج
ما أعرف أنطق إلا.. حق
لو تحب أقطع لسانى
ليه يا حاج تعيش أنانى

قبلتك دلوقتي فين؟

لما أولى القبلتين

داسوا أرضه..

بالجزم!!

أو عشان ما هو أقصى فأكبره بعيد عليك!!

وإداريت جوه الحرم؟

فين براقك

تربطه ف الصخرة فين

ولاً فأكبر صخرته..

تبكى عليها م الندم؟

لا يا حاج

فين براقك..

م اللي ساقك..

زى قطعان الغنم؟

لا يا حاج

فين براقك..

م اللي عاقلك..

تحى أمجاد البلاد

والجرح يصرخ بالألم
ليه بتجرى ع السنن
والفريضة ف الجهاد
لما يُحتل الوطن؟
إيه يا حاج
شفت أطفال الحجارة
ولا لا؟
شفته طبعاً ع الشاشات
قول بحق
شفت طفل بيستوى
زى عنقود المنب
من عسكرى.. خوفاً
بدبشك بندقيه بينضرب
خدت بالك لما مات..
ولا لا..
قول بحق؟

شفته طبعا ع الشاشات
زى ما شفناك يا حاج
من جبل عرفات تُرَجَّ
دعوتك كل الجهات
النفاق م الوش هج
والإيمان م القلب وج
والجبين بيشع نور
والدموع ماله العيون
نادمه عن كل اللي فات!!
دُقت زمزم ١١٩ ولا لا٩
أد إيه كانت زلال
زمزم يا حاج....
تسرى على قد السؤال
ما انت عارف آه يا حاج
الرب رب للقلوب..
والنيه ف الأفعال

ليه بترجع كل شيء يرجع مكانه
تبني بين قلبك وبين الحق سور
والحرام عندك.. حلال..

م اللي قال؟

م اللي قال إن الخضوع فن وسياسة
"ده نجاسة"!!

م اللي قال إن الهوان ع النفس كان
فطنه وكياسه
"ده وكاسه"!!

م اللي قال إن الطمع فى المال.. فراسه
"ده طفاسه"!!

م اللي قال حته نحاس..

بالغش يوم راح تبقى ماسه

لا يا حاج..

طول عمرها هتعيش.. نحاسه!!

شفناك يا حاج

وانت بتشاور لأهلك..

ع الشاشات

زى ما شفت اللى مات
شفت دوله ع الخريطة
قاعده زى الأرملة
ضهرها مسنود بحيطه
وعيالها حاطين الأيدى فوق الحدود
فى العيد حزينه..
قاعده إيدها مريمه!!
يا حاج عمرك شفت طفل..
يضرب بطوبه مدرعه!؟
والعسكرى الصهيونى..
خايف.. ينزوى
ينزل لتحت ويختفى
خايف لعينه تتقلع
يا أمه لسه بتهتفى..
عيب إختشى

هاكرنا بشويه كلام عن السلاح..

راح نرتشى!!

بالطوبه عمرك شفت آله مولعه

قول يا حاج..

دى مدرعة

المسكرى خايف لعينه تتقلع

يا حاج يا تروح تشترك..

هى الانتفاضه...

يا تتجلع؟

سمارة

أَسْمَرِ يا وَش الحبيب أبيض كثير.. قلبُه
والشمس لو يوم تغيب يحى الوجود.. حُبُه
يهدى بعطفه الغريب لوتاه فى يوم.. دَرْبُه^(١)
راح فىن يكون مأمنه قلب الزمان.. دَارُ بُه^(٢)
إفتح إيديك واحضنه هجر الحبيب.. طال بُه



حبيبتى قلبى طَوى مش جمل أفعالك
إمشى عليه اتمخطرى يا بخته.. يوم شالك
شوف البعيد مفتري قام هَزْ.. خُلْخالِك^(٣)
صوته ف ودنى همس وحكى لى عن حالك
قاللى حبيبتك فرس أنا قُلْتُ.. خيالِك



(١) دربه: طريقه.

(٢) دار به: لف به وخيره.

(٣) خلخالك: الخلخال: سوار يلبس فى الرجل الأثكل.

قلبك ده قلب التمر فوق النخيل.. عَلاً
والفم شهد الخمر زاد الحياة.. حَلاً
الليل فى لون الشعر والعين.. نجوم الفَلاً^(١)
قلبي لعنيكى مُجيب لو يوم تقول.. يَلاً^(٢)
ياللى هواكى طيب للقلب لو يوم.. سَلاً^(٣)



عديت بحور الحب عايم على ضهرى
لاف يوم طلبت القرب ولا يوم نسيت نهرى
محلها عين الحبيب أهديها أنا عمرى
فارس وقلبي وحيد نفسى تكون مُهرى
مهلك يا قلب الحبيب ليه للقلوب.. تهرى؟!

(١) الفلا: الصحراء.

(٢) يالا = يا ولد: يا واد باللفه العامية المصرية ولاد البلد.

(٣) سلا: نسى.

إسكندرية

يا إسكندريه حرام عليكى
خليتى قلبى.. ما بين إيديكى
زى العجينة

الصبح عاشق
بالليل مرافق
ف الضهر قلبى..

أجمل سفينة
الصبح عاشق أحضن شوارعك
وأشم ريحتك
بالليل مرافق موجك ويحرك..
بالسر أبوحلك
فى الضهر قلبى أجمل سفينة
يرفعها موجك زى العروسة
ترسى ف موانى
من تانى ترجع..
تشتاق لسحرك

ناسك... فَنَارِكْ

ليلك.. نهارك

مين فى الحلاوة والحسن قَدَّكَ

والقلعة طال الله ع البحر الأبيض

ع المرسى ترمى الصباح يوماتى

ويبوسوا خدك

والشمس تغزل فستانها الأبيض

بالظبط أدك

والموج ييجرى يحضن فى شطك

والبدر يحرس حُسْنُكَ ليلاتى

يا إسكندرية بحرك حياتى

كورنيش ماليش غير إنى أعيش..

عليه أغنى

أنا حلمى حلمك

وعلمى علمك

ما أعرف لماذا؟

فيكى إيه ساحرنى

كل اللى فاكركه كان فى الأجازة

يومين أجيلك وأعوم ف بحرك

قوام يعدوا أرجع أرواح

ده غصب عنى

جايز بناتك السمر همة

جايز ولادك بنشاط وهمة

جايز حنانك ولا ابتسامتك

أنا إيه؟ حسدتك؟

لا لأ.. سلامتك..

أنا مش غريب

أنا مش هاسمحك

وحياة ملامحك

إلا إن تقولى..

إنت الحبيب

بالعطر فوحى

بالسّر بوحى

وحياة عيونك

سرك ف بيرأ

ده هواكى روحى

بلسم جروحي

وف قلبى أصونك

لو أحب غيرك

أصبح ضريز

الفهرس

٧	مفتتح
٨	إسألنى عنىكى
١١	عمر الشقاوة
١٥	وفىن بس زىك ألقى
١٧	ساعة الوصل
٢٢	حنى يا ياسمينه حنى
٢٤	حبك فرض
٢٥	أحلى ذنب
٢٦	بكره لازم نتحصر
٢٧	إنت القمر
٣٠	إزاي نخاف
٣٣	فانوس عزرائيل
٤١	مذكرات مهاجر رغم أنفه
٤٦	الناس والأرض
٥٣	ياسى الودع ما ترد
٥٨	الأوله آه

٦٠	ولما فتنا
٦٢	مصر يا أحلى الأسامي
٦٤	مصر المحبه
٦٥	قوم.. يا مصرى
٦٦	أنا
٧٠	صح النوم
٧٥	آه يا نيل
٧٨	كاكساكاوا
٨٠	سما سيب وشارى
٨٤	مريم وفاطنه
٩٠	الديك الرومى
٩٤	جوز أمى
٩٨	فلسطين
١٠٦	سمارة
١٠٨	إسكندرية